



Ukiortaami oqalugiaat 2021

Naalakkersuisut Siulittaasuut Kim Kielsen

(Oqalugiarnermi oqaatigineqartut atuupput)

Asasakka innuttaaqatikka,

Ukioq 2020 naavoq. Neriuppunga juulli nuannersumik atorsimassagisi, peqqillusilu ukiumut nutaamut iserluarsimassasusi.

Ukioq qaangigarput ukiuuvoq allanit allaanerulluinnartoq. Ukioq 2020 unammilligassaqaarsimaqaaq siornatigut misilittagarinngisagut nualluussuup COVID-19-ip pilersitai aqquasaarsigit.

Nualluussuaq siammatsaaliorniarlugu assigiinngitsutigut sukaterisariaqartarsimavugut. Inuttut ataasiakkaatut, ilaqutariittut aammalu nunaqqatigiittut inuunerput allatut atortariaqarsimavarput, ilaatigut qanitagut najorsinnaasarsimanagit. Timersortartut unammiaarsinnaanerit killersorneqartariaqarsimalluni.

Tamakkua killilersuutit allaqussiinnaasimanngilagut, taamaattumillu tamassinnut qujassuteqarusuppunga. Qujarusuppunga paasinnilluarlusi nualluussuup siammatsaaliorneranut akisussaaqataallusi ikiuukkassi. Neriutigeqaara inuiaqatigiittut ikioqatigiinnerput ukiumi nutaami nangissagipput, nualluussuup nunatsinni siaruaatinnginnissaa anguniarlugu.

Piffissaq manna iluatsillugu nualluussuup akiorneqarnerani toqqaannartumik suleqataasimasut tamaasa qamannga pisumik qujaffigerusuppakka.

Ukiumi nutaami nunarsuarmioqatigiit tamatta neriutigaarput akiuussutissamik innuttaasut tamarmik neqeroorfigineqarsinnaaassasut.

Kissaatigaara nualluussuup atuunnerani ataatsimoorneq takutitarsi nualluussuup qaangiunnerani attatiinnarumaaripput, siulitta imminnut ikioqatigiittarnerisa anersaavanik takutitsilluinnartuummat.

Inuiaqatigiinni Ilagiit pingaarutilerujussuupput, ukioq 2020-ip naajartornerani nunatsinni Ilagiit nutaamik siuttoqalerpugut. Ukiorpassuarni Ilagiinni siuttuulluni

nunatsinni biskop-iusimasoq sulilluarsimanera pillugu qutsavigaarput, taamatullu nutaatut Ilagiinni siuttunngortoq, sulilluarnissaanik kissaallugu tikilluaqqullugu.

Ukiup ingerlanerani ilatsinniit qimagaasimavugut. Annaasaqarsimasut ilaquataasut qanigisaasullu qamannga pisumik misiginneqatingaarpassi, neriuutigaaralu inuunermi nuannersut kingumut eqqaallugit tuppallersaatitut atorsinnaajumaarisi.

Ukioq 2021-mi ullut sungiusimasatta uteqqinnissaat neriuuteqarfigivakka. Ukiuni kingullerni arlaqartuni nunatta aningaasarsiornera siuariartorsimaqaaq. Ukioq 2020 aningaasarsionikkut unikaallaffiusimagaluartoq, aningaasaqarnikkut inissisimalluarnitta ingerlaannarsinnaanerput qulakkeerpaa.

Nunatsinni ineriartornermut aningaasaqarluarnitsinnullu kivitseqataasimasut tamaasa qujaffigerusuppakka. Minnerunngitsumik aalisartut inuutissarsiutinillu allanik ingerlataqartut, aningasaqarnitta patajaatsumik inissisimaneranut kivitseqataanerat qujassutigerusuppara.

Naalackersuisuniit pingaarnertut angorusussimavarput nunatsinni inuiaqatigiit atugarissaarnerunissaat. Taamaattumik ukiuni kingullerni suliffissaaleqineq annertuumik qaangerniarlugu suliniutit ingerlanneqarput.

Ilinniartitaaneq, piginnaanngorsarneq aammalu inuutissarsiutit inerisarnissaat aallunneqarput.

Suliffeqarfeeqqanik nutaanik isumassarsiallu nutaat piviusunngorsinnaaneritut perfiarfissat annertusarsimavugut. Minnerunngitsumillu akit assigiilerteqqinnerisa kingunerisimavaat inoqarfinni tamani ineriartornermut perfiarfissat annertusineri.

Nunatsinni sanaartukkanut inuussutissarsiornermullu aningaasaliinerit ingerlanneqarsimapput aammalu napparsimasut atugaannut pitsaanerulersitsisussamik, minnerunngitsumillu inuiaqatigiit nammassinnaasaannik tunngavissat suliarisimallutigit.

Suut tamaasa eqqarsaatigalugit nunatsinni aningaasarsionikkut siuariartornerput paarilluassavarput, sapangissanngilarput.

*

Nuannaarutigaaara takusinnaasimagakku nunatsinni pinngortitap kusanaqisup innuttaminit aasaq manna misigisassarsiorfigineqarlunilu atorluarneqara, nunatsinnilu takornarialerisut nalaataannut imaannangitsumut iluaqusiilluartumik.

Naalakkersuisuniillu siunniupparput nunatsinni sulinngiffeqarnerup oqinnerusumik atorneqasinnaanissaata aqutissiunnissaa.

Naalakkersuisuniit nunatsinni takornariaqarnerup siumut aallaqqinnissaa anguniarlugu, 2021-ip ingerlanerni susassaqtut peqatigalugit takornariatitsinermut periusissiamik nutaamik pissutsit attuuttut aallaavigalugit, siumut isigisumik pilersitsissapput. Taamaaliornikkut takornariaqarnermi inuutissarsiuteqartut 2020-mi nalaassimasaat pilertortumik qaangerneqarsinnaanissaat aqutissiukkumallugu.

Inuutissarsiutinik nutaanik aammalu takornariatitsinerup inerisaqqinnissaa Naalakkersuisuniit pingaartipparput. Ukiuni kingullerni suliffissaaleqineq affaannangorsimavoq, taamaattumillu nutaaliornissamut alloriartoqarsinnaanngorluni.

Aalisarneq nunatta aningaasarsiornerani qitiulluinnarpoq. Aalisarneq ingerlalluartoq nunatsinnut napatittisuuvoq, taammaattorli aningaasarsiornitta siammasinnerusumik tunngaveqarnissaa sulissutigaarput. Aalisarnerup takornariaqarnerullu saniatigut aatsitassarsiorneq nunatta anigaasaqarneranut tapertaarnera annertusiartorpoq. Ukiumi qaangiuttumi aatsitassanik piiaanissamut akuersissutit marluk nutaat tunniunneqarput. Akuersissutit takutippaat nunarsuaq tamakkerlugu aningaasarsiorneq unikaallaqqagaluartoq nunatta pisuussutai soqutigilluarneqartut.

2015-imiit aningaasanik illuartitsinikkut, Nuummi Ilulissanilu mittarfissuassat sanaartornissaat periarfissaalersimavoq, sanaartornerlu ingerlallualereerluni.

Mittarfissuarnik sanaartorneq annertuumik sulisunik atuiffiuvoq, aammalu siunissami suliffiulersussanik malitseqalereerluni. Akunnittarfissanik nutaanik

sanaartorneq aallartereerpoq, inuutissarsiutinillu ingerlataqartut periarfissanik ujartuillutik pilersarusiorlutik aallartereerput.

Nuannerpoq takullugu illoqarfinni taakkunani eqqaanilu periarfissarititaalersussat nutaat atorluarneqarneri, nunatsinnilu ineriartortitseqataanissamut inuit kajumissusermik peqarluartut.

Nunarput tamaat inerisarneqartussaavoq. Tullinnguupporlu kujataani – Qaqortumi mittarfissualiornissap piviusunngortinnissaa. Suliariumannittussarsiusseq ingerlavoq, Naalackersuisuniillu naatsorsuutigaarput 2021-mi aasartinnagu sanaartornissaq aallartinneqassasoq.

Kalaallit Nunaata kujataani ineriartorneq siuariassappat, Qaqortumi mittarfissualiortoqarnissaa avaqqunneqarsinnaanngilaq.

Tamatuma saniatigut nunatsinni silaannakkut angallannerup ataqatigiissumik, eqaannerusumik, ullumikkumullu naleqqunnerusumik, ineriartortittuarnissaanut alloriarnissaq tulleeq Naalackersuisut Inatsiartunut ukiarmi saqqummiutereerpaat.

Inatsisartut ukiaanerani ataatsimiinnerminni Uummannami, Qeqertarsuami, Qasigiannuani, Kangaatsiami, Narsami, Nanortalimmi, Tasiilami Ittoqqortoormiunilu mittarfiliortoqarnissaanut, tulleriaarinerullu qanoq isikkoqarnissaa oqaluuseraat, tassanilu tunngaviusumik sanaartortoqarnissaa ilalerneqarluni.

Naalackersuisuniit siunniunneqarpoq Qeqertarsuaq, Nanortalik, Tasiilaq, Illoqqortoormiullu siulliunneqarnissaat, pilersarusiornerillu piaartumik aallartinneqarnissaat. Suliassarpullu qilanaaraarput.

*

Ukiuni kingullerni suliffeqarfiutigut ingerlalluarsimaqaat annertuumillu inerisaaffiusimallutik. Royal Greenland A/S kilisaatini nutaarsuarnik taarsersuleruttorpai, nunarsuatsinni nutaaliaanerpaanik imartatsinnullu tulluarsakkanik peqalersussaallutik.

Aalisarnermik inuutissarsiutip patajaatsumik ingerlanneqarsinnaaneranut tunngavisseeqataasoq Pinngortitaleriffik nutaamik misissuutissaminik

umiarsuartaalerpoq. Tamaalilluni inuutissarsiutitta pingaanersaata inissisimanera suli nukittunerulissaaq.

Tele Greenland A/S ukiuni sisamani kingullerni attaveqaatit annertuumik anigaasartuutaasumik nutarterlugillu inerisartuarsimavai, tamanut iluaqutaaasumik.

Air Greenland A/S nammineerluta pigilersimasarput, ukioq kingulliup ingerlanerani annertuumik eqqorneqaraluarluni siunissamut pilersaarutini nalimmassarlugit ingerlappai.

Ukiumi qaangiuttumi kiffartuussinissamut isumaqatigiissutit ukiunut qulinut sivitsorneqarnissaannut maanna kiffartuussinissamik isumaqatigiissuteqartunut Naalakkersuisut isumaqatigiissuteqarput.

Isumaqatigiissutit sivitsornerisigut maanna kiffartuussinissamut isumaqatigiissuteqarfigineqartut, nunatsinni angallannerup pitsanngorsarnissaanut, pigisamik nutarterneqarnissaannut aammalu piffissamut ungasinnerusumut pilersaarusiornissamut periarfissaqalerput.

Sivitsuinerullu iluaqutissartai takussutissaqalereerput.

Air Greenland, - danskillu issittumi illersornissaqarfiat, upalungaarsimaneq pillugu suleqatigiinnissamut isumaqatigiissummik nutaamik, ukiunut aqqaneq-marlunnut atuuttussamik, isumaqatigiissuteqarput ullumikkut januaarip aallaqqaataani atuutilersumik.

Isumaqatigiissutit taakku malitsigisaanik qulimiguulinnik pingasunik nutaanik ujaasinermi annaassiniarnermilu atorneqartussamik, Air Greenland pisaassaaq, taakkunanilu marluk tikereerlutik. Saniatigullu inoqarfinnut mikinerusunut qulimiguullit nutaat tallimat inunnik assartuinissamut atugassat pigineqalissallutik. Taakkunani siulleq upernaamut tikittussaalluni, saniatigut imarpik qulaallugu timmisartorsuarmik Air Greenlandip pisinissaanut isumaqatigiissut atsiorneqareerluni.

Ukioq 2020 Royal Arctic Line-imut aamma alloriarnernik misigiffiuvoq. Nunatsinnut umiarsuaq assartuut nutaaq angisooq tikippoq aammalu imaatigut

assartuinermi Eimskippimik suleqateqalernissaq sivitsortumik utaqqineqarsimasoq kiisami atuutilerpoq. Qularutiginnigilaralu suleqatigiinneq siunissami nassiussanik assartuinermut akit apparnerannik malitseqarumaartoq aqutillu nutaat nunatta avataanut niuernerup ineriartorteqqinnissaanut periarfissanik nutaanik pilersitsiumaartut.

Soorlutaaq ukiumi qaangiuttumi, nunatta kangianut umiarsuarmik aalajangersimasumik assartuisussamik Royal Artic Line pisaarpoq, tappavunga akulikinnerusumik umiarsuaqartalerneranik malitseqartumik.

Ukioq 2020-mi nunaqarfinnut pajuttaatit marluk nutaat pisaarineqarput, ukiorlu 2021-mi nunaqarfinnut pajuttaatit nutaat pingasut tikittussaassallutik.

Suliffeqarfiutigit ukiuni kingullermi annertuumik inerisarsimapput. Taakkulu suliffissanik nutaanik pilersitsimapput. Minnerunngitsumillu ineriartornerisa malitsigaat, nunarsuarmioqatigiinnut unammillersinnaassuseqarnerup annertusinera.

*

Nunatsinni suliffissaaleqineq akiorniarlugu Naalakkersuisut suliffeqarnermut periusissiaat 2015-imeersoq, inerisaqqillugu periusissiaq nutaaq 2021-miit 2023-mut atuuttusaaq maanna atuutilerpoq. 2015-imiit ingerlanneqartut kingunerivaat suliffissaaleqinerup affaannangortinnera, taamaattumillu ingerlariaqqinnissami iliuusissatut anguniakkat pingaarnerit makkuupput:

- Siullertut, inuussutissarsiorfinnik amerlanerusunik aningaasarsiornikkut siuariartortitsisussanik suliffissanillu pilersitsisussanik inerisaasoqassaaq.
- Aappaattut, inuusuttut suliffissaaleqinerat millisarneqassaaq.
- Pingajuaattut, suliffissaqartitsinissamut iliuutsit aqutigalugit nuna tamakkerlugu suliffeqarneq annertusarneqassaaq sulisullu suliffeqarfinnut tulluunnerusunut sulilersinneqartarnissaat qulakkeerniarneqassaaq.

Naalakkersuisut siulittaasuattut pingaartilluinnarpara, inuusuttatta ilinniakkamik aallartitsinngikkunik suliffeqarfinni sulilernissaat. Minnerunngitsumik

angajoqqaat aningaasarsiorfissanik amerlanerusunik periarfissaqartinnerisigut meerartaminnut pilersuinissaminnut nukissaqarnerulernissaat.

Ukiuni kingullerni suliffeqarfinnik aallartisaaniartunut inatsisit nalimmassarneqarnikuupput. Tamakku malitsigaat suliffeqarfinnik aallartisaasut, suliffissanik nutaanik pilersitsisut arlaqalernikumumata. Taakkulu ineriartuarnissaat pingaaruteqarpoq.

*

Innuttaasut peqqissuunissaannut pilersaarut Inuuneritta III saqqummiuteqqammerparput. Pilersaarut 2020-mit 2030-mut ingerlasussami qulakkeerniarneqarpoq meerartatta nunatsinni sumiiffinni tamani toqqissisimassumik peroriartornissaat.

Pilersaarusiap kommunit aammalu najukkani tamani susassaqtut peqatigalugit inersisarneqassaaq. Pingaernerpaatut aallaviussaaq inoqarfinni tamani nukittuffiit aallaaviginissaat, taamatullu innuttaasut tamarmik akuutinnissaat.

*

Kalaallit qallunaallu oqartussaasuisa nunatsinni meeqqat inuusuttullu atugarisisaasa pitsanngorsarnissaannut suleqatigiinnerat aallartissimaleruttorpoq, 2023-illu tungaanut ingerlassalluni. Ukiuni tulliuttuni suliniutit arlallit piviusunngortissavagut, meerartatta inuusuttattalu inuunerissaarnerulernissaannut peqqissumillu ineriartornissaannut aqutissiuussisussat.

Suleqatigiinneq aallarnerlugu ukiarmi kommunit sulinerisa nukittorsarneqarnerat ingerlanneqarpoq, meeqqat inuusuttullu pisariaqartitsisut pilertortumik ikiorserneqarsinnaanngorlugit.

Ajoraluartumik meerartatta ilai suli toqqissillutik angerlarsimaffeqanngillat. Taamaattumik angajoqqaat meqqaminnut akisussaffeqarneranni ikorfartorneqarsinnaanissaat minngerunngitsumillu meeqqaat toqqissimasumik peroriartornissaat qulakkeerniarlugu suliat ingerlatiinnaqassapput.

Suliat ineriartornerini takussutissat ilagaat, meeqqanut inuusuttunullu 18-init inorlugit ukiullit ikiorniarlugit, kommunini tamani ornittakkanik pilersitsisoqaranera. Taamaalilluni angerlarsimaffimmini ajornartorsiortoqartillugu, meeqqat toqqissimasumik ornittagassaqalersillugit.

Ornittakkami meeqqat inuusuttullu isumassorneqarnissaannik periarfissiisaaq. Pingaarnertulli Inuuneritta III-mi siunertarineqartut ataavaartumik aallunneqarsinnaanissaat qulakkeerneqassalluni tassaasorlu: Meeqqat toqqissimasumik peroriartornissaanut aqutissiussineq.

*

Nunatta oqaluttuarisaanerani aqquusaakkatta ilaat imaanngaangitsuusimapput.

Aqquusaarsimasatta ilagaat kalaallit meerartai 22-it sorlaqarfiannit, ilaqutaannit, kulturiannit, oqaatsinillu ilitsoqqussaannit peersillugit nunatsinni ilinniartitaarnermut qallunaanngorsagaanermullu siuttuulernissaannut, misiliutitut Qallunaat Nunaannut 1951-imi aallartitaanerat.

Ukiut 70-igajaat matuma siorna pisimasoq alianartoq taamanikkut meeraasunut, kingunerluuteqarsimaqaaq. Pisimasup qulaajarneqarnerata malitsigisaanik danskit statsministeriat Mette Frederiksen, Naalagaaffik sinnerlugu utoqqatserpoq.

Naalakkersuisuniit statsminister-ip utoqqatsernera pissusissamisoortutut isigaarput ilalerlugulu.

Naalakkersuisut siulittaasuattut innuttaasutullu nunatta oqaluttuarisaanerani pisup mamianartup iliuuseqarfiginissaanut aqut ukiorpassuarni malinnaavigisimavara. Maannalu utoqqatsertoqareernerata kingorna pineqartut ajunnginnerpaamik inuernerminnilu pitsaasumik ingerlariaqqinnissaannik qamanna pisumik kissaappakka.

*

Utoqqartatta pitsaasumik pingaartinneqartutullu misigalutik akornatsinni inooqataanissaat Naalakkersuisut ukiuni kingullerni suliniutigisimavaat.

Utoqqaat amerlapput piginnaaneqarluarlutillu nukissaqarluartut. Taakkualu piginnaaneri, ilisimasaat nukiillu inuiaqatigiinni annertuumik pisaqartippagut. Taamaattumik Naalakkersuisuniit utoqqaat pisinnaasut sulerusuttullu isertitaqarsinnaanerannut periafissaat annertusarsimavagut. Tamannali uniffiigiinnarnagu ukiunut qulinut tulliuuttunut utoqqarnut politikkissaq

pilersaarusiuleruttorparput. Pilersaarusiorneq utoqqaat oqaaseqartartuat, kommunit utoqqaallu kattuffiat qanimut suleqatigalugit inerisarneqartuassaaq.

*

Ukiuni kingullerni ilinniartitaanerup annertuumik sammineqarneranut Naalakkersuisuniit ilaasimavoq siammasissumik, aammalu isiginnaarutit atorlugit najugarisaq qimangikkaluarlugu atuarlunilu ilinniarsinnaanerup annertusarnissaa

Coronallu ajornartoortitsinerata nalaani annertuumik misilittagaqarfigilikatta ilagivaat ungasianiit atuartitsinerit ingerlarsinnaanerat. Ukiut siuliini piareersaataasimasut annertuumik iluaqutigalugit misilittarneqarput.

Pissusissamisoortut isigaara maannamut misilittagarineqalersut ineriartorteqqinnerisigut, ilinniakkat assigiinngitsut nunatsinni sumiluunniit najugaqaraluaanni ingerlanneqarsinnaalernissaannut periarfissanik annertusaanissaaq. Ullumikkummi nunatsinni inoqarfiit 90%-ii sinnerlugit, pitsaasumik attaveqaateqarput, Tele Greenland A/S -ip sakkortusaaviit, immap naqqanilu kabeli ukiuni kingullerni inerisartuarmagit. Misilittakkallu nutaat ilinniutigalugit internetsip periarfissarititai atorluarnerisigut, nunatsinni ilinniagaqassutsip qaffassarnissaanut nutaamik eqqarsarnikkut inerisaqqinnissarput.

*

Ukioq qaangiuttoq nunatta nunanut allanut tunngasunut suliaani angusaqarfiulluarpoq. Pituffimmut siunissami isumaqatigiissusiorsinnaaneq nammineq nunatut qulakkeerneqarpoq. Tassanilu Danmark-imut suleqateqarnerup naligittullu inissikkiartuaarnera ersiutaalluni

Tamatsinnut pingaaruteqarsimavoq amerikarmiut nunatsinniinnerat siammasissumik inuiaqatigiinnut ilinniartitaanikkut, suliffeqarnikkut aningaasarsiornikkullu isumaqatigiissutip iluaqutaanissaa.

Taamaalilluni ukiut arfinillit inulaarlugit ingerlareersullu Pituffimmi kiffartuussinissamat isumaqatigiissutip amerikarmiut suliffeqarfiutaannut tunniunneqareersorlu iluarsissutissamik isumaqatigiissusiortoqarpoq.

Ukiuni kingullerni Kalaallit Nunaata sinniisoqarfeqarnera inerisarsimavarput, kingullermik Island-imi 2018-imi sinniisoqarfimmik ammaavugut. Kalaallit Nunaata nunani allani suliniutai annertusarnissat nangillugu 2021-mi Asiap Kangiani sinniisoqarfimmik pilersitsisoqassaaq.

Asiap Kangiani nunatta sinniisoqarfeqalerneratigut toqqaannartumik Asiap Kangiani oqartussanik suliffeqarfinnillu oqaloqateqarsinnaalernissap periarfissaalernissaa pisariaqarluinnartut Naalakkersuisut isigaat. Taamattumillu nunatta Asiamut nioqquteqartarnerata annertusarnissaa aallartitaqarfiup pingaarnertut isumagissavaa.

*

Ukioq 2021 nalliuttorsiorfiusussaavoq. Hans Egedep tikinneranit ukiut 300-inngussapput aammalu kunngikkormiut nunatsinnut tikeraaqqaarnerannit ukiut 100-unngussallutik. Taamaammat ataqinartorsuup Dronning Margrethe II, tikeraarnissaa piareersarneqarpoq.

Qularutiginnilara ukioq nutaaq 2021 sorpassuartigut nunatsinnut angusaqarfiulluarumaartoq.

Toqqammaviit anigaasarsiorfissat ilinniarfissat, suliffissallu inatsisitigut ukiuni kingullerni pilersippagut. Tullinnguupporlu periarfissat atorluarnissaat – tassani inuk nammineq atorluaanissaminut akisussaassaaq. Periarfissat tamatsinnut ammapput. Atorluartigit!

Angusimasat aammalu ingerlavigilikkat Kalaallit Nunaata namminiilivinnissaanut aqutissiuussipput.

Namminiilernissatsinnut nukiit tunngavissat tassaapput:

Innuttaasut minnerunngitsumillu inuusuttortagut.

Taamaattumillu pisarnittut naggasiullugu inuusuttortagut kajumissaarumavakka.

Periarfissat isaanneqartut atorluaqqullugit.

Anguniagaqaritsi !

Aporfeqarpat – uniffigiinnarnagit ilinniarfigisigit

nukkassaatisigit.

Inuiaat ikittunnguusugut isumalluutigaatsigit.

Kivissiuk nunarput – siuligut qajavissuit maani nunami, najugaqarnissatsinnik toqqammaviliisut, uatsinnut tunniussaat, nangittumik, kinguaassatsinnut, nunatut nammineertutut, isaassinnaamngorlugu.

Tamattami maani, kingoqqisuusugut, qajavissuit kinguaarivaatigut

Pissaanerallu, taqqatsinni tillerpoq.

Uagununa Nunarput – pisussaaffigaarput, siuarsartuassallugu !

Akisussaaffik, tigusiuk ! Nunarput siuarsarsiuk.

Taamatut oqarlunga Naalackersuisut inuiaqatigiillu sinnerlugit ukiortaami Ataqqinartorsuaq Dronningi taassumalu Ilaqutai Kunngikkormiut pilluaquakka. Aammattaaq pilluaquakka danskit Folketingiat naalackersuisuilu, savalimmiormiut Lagtingiat naalackersuisuilu, kiisalu inuiaat danskit savalimmiormiullu tamaasa.

Ukiortaami pilluaritsi!

Guutip nunarput sernigiliuk.